

He tūmahi anō hei whai pea māu: Te ine i te ara whiu

Ngohe 1:



Kimihia te ataata pai katoa o te whakarewanga o te taurira whakamātau o tō tākirirangi.

Ngohe 2:

Tonoa te Kaitohutohu Whāinga māna e whakaatu te ataata ki runga i te papamā ki te tukuata.

He tīwhiri! Mēnā kāore ā koutou tukuata, ka pai te whakamahi i te pepa tawhai. Whakatakotoria ki runga i te mata o te rorohiko, o te papahiko rānei kia pai ai te tā i te ara whiu.

Kua oti ngā taurira whakamātau o tō tākirirangi te whakarewa me te whakaahua. Kia huri tātou ināianei ki te tā i te ara whiu kia nui ake ai ō raraunga hei whakapai ake i ngā tākirirangi.

Ko te **ara whiu** te ara ka whāia, te ara rānei e tūmanakohia ana ka whāia e tō tākirirangi i tōna rerenga i te hau takiwā.

Ngohe 3:



Kia tīmata koe i te tīmataka o te whakarewanga, me tū te ataata, ā, tāia tētahi tohu i runga i tō tākirirangi.

Ngohe 4:

Me rite tonu tō whakatū i te ataata i ia whakaahua me te tā anō i tētahi tohu ki runga i tō tākirirangi. Me mutu tēnei kia tau iho tō tākirirangi ki te papa (kia puta rānei tō tākirirangi ki waho o te whakaahua).

Ngohe 5:

Tūhonoa ia tohu kia puta mai ai te rārangi e whakaatu mai ana i te ara whiu.

Ka rawe tā koutou mahi, e ngā kaipōkai tuarangi!
Kua oti i a koutou te ara whiu o tō tākirirangi te tā. Waiho ngā ara whiu i te papamā, tāia rānei hei kauwhata.

Tātāritanga

Mā koutou ko tō rōpū e whakaaro ake he aha te tikanga o te ara whiu o te tākirirangi, ā, me pēhea te whakamahi i te ara whiu hei whakapai ake i ngā taurira whakamātau.

I teitei, i roa rānei te rerenga o tō tākirirangi? I roa te rerenga, engari kāore i teitei? I pīoioi, kātahi ka tuki ki te papa i te taunga iho?